

Na osnovu člana 19. Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona (Službene novine Zeničko-dobojskog kantona“, broj: 4/14), sa ciljem izvršenja propisane procedure upisa u sudski registar, na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 186. sjednici, održanoj 09.10.2014.godine, d o n o s i

PRIVREMENI STATUT

Javne ustanove Centar za djecu i odrasle osobe s posebnim potrebama Zeničko-dobojskog kantona

I OSNOVNE ODREDBE

Član 1. (Predmet)

(1) Privremenim statutom se uređuju pitanja od značaja za rad Javne ustanove Centar za djecu i odrasle osobe s posebnim potrebama Zeničko-dobojskog kantona (u daljem tekstu: Ustanova), do donošenja i stupanja na snagu Statuta od strane Upravnog odbora, a nakon završetka postupka upisa subjekta u sudski registar.

(2) Odredbama od značaja za rad Ustanove pobliže se uređuju pitanja: naziv i sjedište ustanove, osnivač, obaveze ustanove prema osnivaču, djelatnost ustanove, način i uslovi obavljanja djelatnosti, odnos prema korisnicima usluga, statusne promjene, imenovanje i razrješavanje direktora, drugi organi ustanove koji imaju prava, obaveze i odgovornosti, uslovi i način njihovog izbora i razrješavanja, opći akti koji se donose u Ustanovi i način njihovog donošenja, način ostvarivanja javnosti rada, ostvarivanje prava, obaveza i odgovornosti zaposlenika Ustanove, te druga pitanja utvrđena zakonom.

Član 2. (Osnivački akt)

(1) Ustanova je osnovana Odlukom Skupštine Zeničko-dobojskog kantona, broj: 01-05-16268/14 od 18.08.2014.godine.

(2) Obaveze Ustanove prema osnivaču uređuju se zakonom, podzakonskim aktima, aktima osnivača, statutom i drugim općim aktima.

(3) Ministarstvu za rad, socijalnu politiku i izbjeglice Zeničko-dobojskog kantona Ustanova će dostavljati izvještaje o poslovanju, godišnje planove, odnosno programe rada i druge akte od značaja za djelatnost Ustanove.

Član 3. (Pravni status)

(1) Javna ustanova Centar za djecu i odrasle osobe s posebnim potrebama Zeničko-dobojskog kantona ima svojstvo pravnog lica i upisuje se u sudski registar.

(2) Ustanova iz stava (1) ovog člana je javna ustanova u državnoj svojini.

II NAZIV, SJEDIŠTE I PEČAT USTANOVE

Član 4. (Naziv javne ustanove)

(1) Ustanova posluje pod nazivom Javna ustanova Centar za djecu i odrasle osobe s posebnim potrebama Zeničko-dobojskog kantona.

(2) Skraćeni naziv Ustanove je: Centar za osobe s posebnim potrebama.

(3) Sjedište Ustanove je: Ulica Saliha Cakana Mulalića br. 5, Zenica

Član 5. (Pečat i štambilj)

(1) Ustanova ima svoj pečat i štambilj.

(2) Pečat je okruglog oblika i izrađuje se u dvije veličine, veliki prečnika 30mm i mali prečnika 20mm.

(3) Štambilj je pravougaonog oblika veličine 55x10mm.

(4) Na pečatima i štambilju je tekst: Javna ustanova Centar za djecu i odrasle osobe s posebnim potrebama Zeničko-dobojskog kantona

Član 6. (Čuvanje pečata)

Posebnim aktom Upravnog odbora bliže se utvrđuje broj pečata i štambilja, njihova upotreba, čuvanje i uništavanje.

III DJELATNOST, SREDSTVA, ODNOSI SA KORISNICIMA I ORGANIZACIJA

Član 7. (Djelatnost)

Djelatnost Ustanove prema Odluci o klasifikaciji djelatnosti Bosne i Hercegovine („Sl.glasnik BiH“, broj: 47/10), je:

- 88.91 – djelatnost dnevne brige o djeci,
- 88.99 – ostale djelatnosti socijalne zaštite bez smještaja,
- 88.10 – djelatnosti socijalne zaštite bez smještaja za starije osobe i osobe sa invaliditetom,
- 86.90 – ostale djelatnosti zdravstvene zaštite,
- 85.59 – ostalo obrazovanje i poučavanje,
- 87.90 – ostale djelatnosti socijalne zaštite u ustanovama sa smještajem.

Član 8. (Ciljevi i zadaci)

Ciljevi i zadaci radi kojih se osniva Ustanova su izgradnja ličnog identiteta, socijalna integracija, izgradnja kompetencija od životnog značaja, priprema za život djece i mladih osoba sa posebnim potrebama kroz individualne i grupne rehabilitacijske i podsticajne mjere, kako je to propisano Odlukom o osnivanju Ustanove.

Član 9.
(Sredstva za osnivanje i rad)

(1) Osnovni kapital Ustanove u visini od 49.250,00 KM osiguran je iz Budžeta Zeničko-dobojskog kantona.

(2) Sredstva za rad Ustanove obezbjeđuju se iz Budžeta Osnivača i po osnovu ugovora sa općinama o učešću u pokriću dijela ili ukupnih troškova usluga Ustanove, te drugih izvora.

Član 10.
(Unutrašnja organizacija)

Unutrašnjom organizacijom se obezbjeđuju uslovi za kvalitetno, zakonito, cjelishodno, ažurno i efikasno obavljanje djelatnosti Ustanove, što će se urediti posebnim općim aktom.

IV ORGANI USTANOVE NA KRAĆI PERIOD

Član 11.
(Upravni odbor imenovan na kraći period)

(1) Organ upravljanja Ustanove je Upravni odbor.

(2) Upravni odbor ima pet članova.

(3) Djelokrug rada Upravnog odbora propisan je Odlukom o osnivanju Ustanove.

(4) Vlada Kantona će u roku od 15 (petnaest) dana od dana stupanja na snagu Odluke o osnivanju Ustanove imenovati Upravni odbor Ustanove, na kraći period utvrđen zakonom a najduže do konačnog imenovanja na ove pozicije po konkursnoj proceduri.

Član 12.
(Uvjeti za Vršioca dužnosti direktora)

(1) Direktor je organ rukovođenja Ustanovom.

(2) Za direktora Ustanove može biti imenovano lice koje pored općih uslova utvrđenih zakonom:

- ima univerzitetsku diplomu društvenog smijera, odnosno visoku stručnu spremu,
- da ima najmanje pet godina radnog iskustva, a najmanje tri godine na rukovodećim poslovima,
- posjeduje smisao za komunikaciju, te organizaciju rada u smislu osiguranja uspješnog rukovođenja.

Član 13.
(Imenovanje vršioca dužnosti direktora)

Vlada Kantona će u roku od 15 (petnaest) dana od dana stupanja na snagu Odluke o osnivanju Ustanove imenovati vršioca dužnosti direktora Ustanove, na kraći period utvrđen zakonom a najduže do konačnog imenovanja na ovu poziciju po konkursnoj proceduri.

Član 14.
(Djelokrug rada vršioca dužnosti direktora)

Djelokrug rada vršioca dužnosti direktora propisan je Odlukom o osnivanju Ustanove i Zakonom o ustanovama („Službeni list R BiH“, broj: 6/92, 8/93 i 13/94), a dužan je i preduzeti sve radnje u postupku upisa Ustanove u sudski registar.

Član 15.
(Nadzor)

Nadzor nad zakonitosti rada Ustanovom vrši Ministarstvo za rad, socijalnu politiku i izbjeglice Zeničko-dobojskog kantona (u daljem tekstu: Ministarstvo).

V OPĆI AKTI

Član 16.
(Opći akti)

Osim Statuta kao općeg akta Ustanova donosi i druge opće akte od značaja za organizaciju rada i sistematizaciju radnih mjesta, plaće zaposlenika, radne odnose, odnosno prava i obaveze zaposlenika, procedure prijema i otpusta korisnika usluga, etičke kodekse zaposlenika i druge akte od ukupnog značaja za uspješan rad Ustanove.

VI ODNOS PREMA KORISNICIMA

Član 17.
(Odnosi sa korisnicima)

Odnosi sa korisnicima usluga Ustanove uspostavljat će se na način i pod uslovima utvrđenim općim propisima, ugovorima i dobrim poslovnim običajima

Član 18.
(Kvalitet usluga Ustanove)

Ustanova će obezbijediti obim i kvalitet usluga korisnicima u nivou prava i obaveza definisanih pojedinačnim ugovorima.

VII JAVNOST RADA I PROFESIONALNA TAJNA

Član 19.
(Javnost rada Ustanove)

(1) Javnost rada Ustanove ostvaruje se:

- obavještanjem javnosti prema potrebi o bitnim pitanjima rada Ustanove, uslovima i rezultatima poslovanja, teškoćama u radu, te drugim pitanjima,
- podnošenjem izvještaja o radu Ministarstvu i Vladi,
- prema potrebi organizovanjem konferencija za sredstva informisanja i davanjem saopštenja,
- oglašavanjem Statuta i drugih općih akata Ustanove na oglasnim pločama.

(2) Upravni odbor može utvrditi druge oblike obavještanja javnosti rada.

Član 20.
(Profesionalna tajna)

Profesionalnom tajnom smatraju se podaci o osobnom ili obiteljskom životu korisnika usluga koji su poznati zaposlenicima Ustanove u obavljanju njihovih poslova, a čije bi neovlašteno priopćavanje moglo štetiti interesima osobe na koje se podatak odnosi.

VIII ZAVRŠNE ODREDBE

Član 21.
(Stupanje na snagu)

Privremeni statut stupa na snagu danom donošenja i bit će objavljen na oglasnoj ploči Ustanove, a važi do 30 dana po donošenju Rješenja o registraciji Ustanove u sudskom registru, nakon čega će Upravni odbor Javne ustanove Centar za djecu i odrasle osobe s posebnim potrebama Zeničko-dobojskog kantona donijeti Statut i podnijeti Vladi na saglasnost.

Broj: 02-_____/14
Datum, 09.10.2014. godine
Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x VD Direktor Ustanove, putem ministarstva,
1x Ministarstvo za rad, soc.pol. i izbjeglice